

इवनिंग डोगरी न्यूज़ बुलेटिन

समे .18:15 Hrs

<><><><><><>

Headlines

1. पैहलें दे गैर कनूनी लैन-देन पर तक्क रखने आहले कुल संसारी कार्जबल FATF दा आखना ऐ जे पुलवामा आतंकी हमले च इस्तेमाल होए दा विस्फोटक आनलाइन मंगाया गेदा हा।
2. मुखमंत्रि उमर अब्दुल्ला होरें जे.के.टी.डी.सी दी बैठक दी अध्यक्षता करदे होई सैलसफा ढांचे ते सेवाएं च बड्डे पैमाने पर सुधार ते विस्तार करने पर जोर दिता।
3. जंगलात मंत्री जावेद राणा होरें डीअर्ज मुख्यालय च आफिसर ब्लॉक दा उद्घाटन कीता, जंगलात दे संरक्षण च नमी टेकनालजी दे इस्तेमाल दा आह्वान कीता।
4. जम्मू-कश्मीर सरकारें नमे मलाजमें दे PRAN नंबर बनाने दे कम्मैं च तेजी आहनने पर जोर दिता।
5. मौसम विभाग नै अगले 2 दिनें दौरान जम्मू-कश्मीर च भारी बरखा, ल्हास-पस्सियां पौने ते हाईं दी चेतावनी जारी कीती ऐ।

<><><><><><>

FATF-Terror

आतंकवाद लेई रपेआ पैहा मुहैया करोआने आहलें पर तक्क रखने ते माली कारवाइएं सरबन्धी कार्य बल FATF नै आखेआ ऐ जे भारत च आतंकवादी हमले आस्तै लोड़चदे समेयान दी खरीद च ई-कामर्स प्लेटफार्म दा इस्तेमाल कीता गेआ। जम्मू-कश्मीर दे पुलवामा ते उत्तर प्रदेश दे गोरखनाथ मंदर च होए दे आतंकवादी हमलें दे सिलसिले च एह गल्ल सामने आई। FATF नै अपनी इक रिपोर्ट च आतंकावदिएं गी रपेआ-पैहा मुहैया करोआने आस्तै सोशल मीडिया, मेसेजिंग ऐप ते Crowdfunding sites दे इस्तेमाल बारें सौहगा कीता हा। प्रतक्ख माली सहायता सिखलाई जां सरबन्धी समेयान दे प्रावधान सने होर दुई नेकां चाल्ली दी मदद आतंकवाद लेई दिती जा रदी ऐ। FATF नै हाल च होए दे आतंकवादी हमले दी निंदेआ कीती ते आखेआ जे इयै नेह आतंकवादी हमलें बगैर माली मदद मुमकिन नेई हैन।

<><><><><><>

CM -JKTDC

जम्मू-कश्मीर च सैलसफा गी मजबूत करने आहली भेठा इक गेंs तैहत मुखमंत्रि उमर अब्दुल्ला होरें अज्ज जम्मू-कश्मीर सैलसफा सरबन्धी विकास कारपोरेशन दे बोर्ड ऑफ डायरेक्टर्स दी बैठक लाई। इस दौरान कारपोरेशन दी कारकरदगी ते केंद्र शासित प्रदेश च सैलसफा सरबन्धी ढांचे ते खातर तवज्जो

सरबन्धी सेवाएं च विस्तार दे तौर-तरीकें पर चर्चा होई। इस दौरान ध्यान JKTDC गी होर बी मता बेहतर ते सैलानिएं दे अनुकूल बनाने पर दिता गेआ। मुखमंत्री होरें नमिएं काड्डें, बेहतर सेवाएं ते स्हूलतें पर ध्यान देने लेई जोर पाया तां जे मते थवां मते सैलानिएं गी आकर्षित कीता जाई सकें ते जम्मू-कश्मीर सैलसफा विकास कारपोरेशन गी सैलसफा सैक्टर च इक बेहतरीन कारपोरेशन दे तौरा पर कायम कीता जाई सकें।

<><><><><><>

Rana-Forest

तंगलात मैहकमे दे मंत्री जावेद अहमद राणा होरें जंगलात दे संरक्षण च नमिएं तकनीकें दे इस्तेमाल दी जरूरतें पर जोर दिंदे होई आखेआ ऐ जे जम्मू-कश्मीर दी सगोसार जैविक बन-सबन्नता दे संरक्षण लेई कुशल जंगलात प्रबंधन बड़ा जरूरी ऐ। अज्ज बेमिना च डीअर मुख्यालय च आफिसर ब्लॉक दा उद्घाटन करदे मौके मंत्री होरें आखेआ जे एहदा मकस कारवाइएं च कुशलता ते ढांचागत सुविधाएं च बाददा करना ऐ। इस मौके राणा होरें भुगौलिक सूचना सरिस्ते जी.आई.एस दा बी जायजा लैता ते आखेआ जे जंगलात संसाधनें दा पता रखने ते उंदे प्रबंधन लेई एह मता महत्वपूर्ण ऐ। उनें आखेआ जे सतत विकास ते जंगलात संरक्षण दे जत्नें गी तेज करने लेई नमी तकनीकें दा इस्तेमाल करना बड़ा जरूरी ऐ।

<><><><><><>

Amarnath-Yatra

श्री अमरनाथ जी दी सलाना जातरा पहलगाम ते बालटाल दौनें रस्ते राएं सुचारू ढंगे सिर जारी ऐ। मुख्य भरै दे अलावा बाहरले मुख्यें थवां बी लोक इस जातरा लेई आवा रदे न। दपैहरी तगर 1 लख 21 जहार श्रद्धालुएं पवितर गुफा च मत्था टेकी लैते दा हा। इस जातरा लेई अजे तगर 4 लख थवां बद्द लोकें अपना पंजीकरण करोआए दा ऐ। फिलीपीन्स थवां आई दी इक श्रद्धालु नै श्री अमरनाथ जी दी जातरा बारै ते कीते गेदे इंतजामें बारै अपने विचार सांझा कीते ते आखेआ।

तोआई, जम्मू दे भगवती नगर आहले आधार शिविर थवां 7 जहार 579 श्रद्धालुएं दा जत्था 302 गड्डिएं दे काफले च सोआर होइयै घाटी लेई रवाना होआ।

<><><><><><>

Amarnath-Langer

चला'रदी सलाना श्री अमरनाथ जी दी जातरा दे मददेनजर खाद्य सुरक्षा सरबन्धी मैहकमें आसेआ जांच गी होर बी तेज ते व्यापक बनाया गेआ ऐ तां जे श्रद्धालुएं गी म्यारी ते साफ-सुथरा खाना उपलब्ध होई सकें। खाद्य सुरक्षा सरबन्धी अधिकारी बलबीर सिंह होरें बनिहाल च लंगर आहली इक थाहर दा दौरा लाया। उनें उत्थे कीते गेदे इंतजामें पर संदोख जाहिर कीता। उनें लंगर लाने आहलें गी आखेआ जे ओह अपना पंजीकरण खाद्य सुरक्षा ते मानक सरबन्धी कनून तैहत करन ते सारे नियम कायदे दा पालन

करन। रामबन जिले च तौले गै मोबाइल फूड टेस्टिंग वैन शुरू होग ते ओह खाने-पीने आहली चीजें दी जांच करोग। इस बारै होर जानकारी दिंदे होई खाद्य सुरक्षा अधिकारी होरें आखेआ।

<><><><><><>

JK-Govt. PRAN

जम्मू-कश्मीर सरकारै सब्भनें अधिकारिणं गी आखेआ ऐ जे राश्ट्री पिंशन बवस्था तैहत नमे सरकारी मलाजमें लेई स्थाई रटैरमेंट खाता नंबर जिसी PRAN नम्बर आखेआ जंदा ऐ, तैयार की लैते जान ते इयां आधार नंबर दा इस्तेमाल करदे होई e-NPS वेबसाइट राणं कीता जाना लोड़चदा। मैहकमे नै पिंशन फंड नियमन ते विकास प्राधिकरण आसेआ पुट्टी गेदिणं चिंताणं गी ते कन्ने प्रोटीन ई-गोव टेकनालोजीस आसेआ बी जे एनपीएस लेई पैहा खाते च नेई पाए जाने करी, माली नुकसान ते निवेश करने च चिर लग्गै करदा ऐ ते एह समें सिर पैहे दा जमा नेई कराया जाना नियमन आसेआ तैह कीती गेदी मियाद दा अनदिक्खी ते खिलाफवर्जी बी ऐ। मैहकमे नै सब्भनें अधिकारिणं गी आखेआ ऐ जे इस चाल्ली दिणं समस्यां कोला बचने लेई इस सारी प्रक्रिया गी समेंसिर मुकम्मल करी लैता जा।

<><><><><><>

Bharat-Sancharan JK

जम्मू-कश्मीर च नमिणं काहड़ें ते टेकनालजी गी बढ़ावा देने दे मकसद कन्ने कल्लै थमां श्रीनगर दे शेर-ए-कश्मीर अंतरराश्ट्री कन्वेंशन सेंटर च त्रै दिनें दी इक बड़्डी नमैश लोआई जारदी ऐ जेदा विषय ऐ भारत संचारण जम्मू-कश्मीर 2025। इस नमैश च बक्ख खेतरे च कीती जारदिणं नमिणं काहड़ें, अनुसंधान ते तकनीकें दी मदद कन्ने कीती जारदी तरक्की ते उपलब्धिणं गी उजागर कीता जागं इस बारै गल्ल करदे होई मिम्बर पार्लियामेंट गुलाम अली खटाना होरें आखेआ जे एह नमैश लोआने दा मकसद जम्मू-कश्मीर दे नौजवानें, करसानें ते उद्यमिणं गी शिक्षित करियै सशक्त बनाना ऐ तां जे हर नमी तरक्की कन्ने खरी चाल्ली वाकफ होई सकन। इस बारै इक प्रेस कांफ्रेंस गी संबोधित करदे होई उनें दस्सेआ।

<><><><><><>

Kishtwar-Meeting

औने आहले धार्मिक कार्यक्रमें शा पैहले सुरक्षा बवस्था गी निग्गर बनाने दी दिशा च गेंह पुट्टदे होई किशतवाड़ दे एसएसपी नरेश सिंह होरें डी.पी.ओ. किशतवाड़ च अपराध ते सुरक्षा मतल्लक इक उच्ची सतह दी जायजा बैठक दी प्रधानता कीती। बैठका च अतिरिक्त एसपी प्रदीप सिंह गोरिया ते सीनियर ऐहलकारें बी हिस्सा लैता। बैठका दरान औंदे ध्यारें दे मददेनजर कीती जाने आहली तैयारिणं सने होरनें बी बक्ख-बक्ख पैहलुणं पर तफसीली गल्लबात कीती गेई।

<><><><><><>

Tribal-Checkup

सेना दी राश्ट्री राइफल्स आसेआ डोडा च इक मुफ्त मेडिकल ते वेटनरी कैंप दा सरिस्ता कीता गेआ। इस दौरान 350 गुज्जर-बकरवाल ते उन्दे 200 मवेशिं दी जांच कीती गेई ते उनेंगी मुफ्त दोआइयां बी दित्तियां गेइयां। इन्दी जांच सेना दे डॉक्टरें ते एस.डी.एच भद्रवाह दी टीम ते वेटनरी अस्पताल दे डॉक्टरें कीती। इस पर लोकें अपनी खुशी जाहिर कीती ते सेना प्रति आभार जताया ते आखेआ।

<><><><><><>

Weather

मौसम विभाग नै समूलचे जम्मू-कश्मीर च खराब मौसम दे चलदे कल्लै तगर केई थाहरें पस्सियां, जिमी धस्सने, पहाड़ें परा कुप्पड़ पौने ते मलबे दे रोहड़ दी चेतावनी जारी कीती ऐ। मैहकमे दा आखना ऐ जे जम्मू प्रांतै दिऐं किश टावीं-टावीं थाहरें कल्लै तगर बड़ी भारी बरखा दे असार न जेदे चलदे दरयाएं ते नालें च पानी दा स्तर बधी सकदा ऐ ते झिगड़े इलाकें च पानी किट्ठा होने दी समस्या पेश आई सकदी ऐ। करसानें गी बी सलाह दिती गेई ऐ जे ओह् अगले 2 दिनें दौरान राई-बाई सरबन्धी अपनी गतिविधिऐं गी अगड़े पाई देन। इस बारे होर मती जानकारी देआ'रदे न मौसम केंद्र श्रीनगर दे निदेशक मुख्तार अहमद।

<><><><><><>